

四庫全書

集部

欽定四庫全書

集部

九華集卷一至四

詳校官庶吉士臣初喬齡

主事臣呂雲棟覆勘

謄錄副貢生臣杭光晉

謄錄監生臣任溥

欽定四庫全書

集部四

提要

九華集二十五卷

別集類三 宋

臣等謹案九華集二十五卷附錄一卷宋員興宗撰興宗有采石戰勝錄已著錄其集見于焦竑國史經籍志者本五十卷乃寶慶三年其孫榮祖所編興宗弟夢協并研李心傳俱為之序明以來久佚不存今檢勘永樂大典

所錄撫拾詮次彙為詩六卷雜文十五卷又
論語解老子解畧西陲筆畧併紹興采石大
戰始末各一卷而原集所載同時祭文可以
互證興宗始末者則別為一卷附之于後集
中多與張栻陸九淵往復書簡益亦講學之
家然所上奏議大抵毅然抗論指陳時弊多
引繩批根之言李心傳序謂歸附既留而垂
遣誓御因逐而旋召均輸久廢而驟復此三

事皆朝廷所必行而興宗矢筆盡言斥逐不
悔則其經濟氣節均有實事非徒侈空談者
矣又洪括撰隸釋時嘗咨以漢碑數事興宗
為之考核源委具見精博今答書一通具在
集中學問淹雅亦未易及雖其文力追韓柳
不無錘鍊過甚之弊然骨力峭勁要無南渡
以後冗長蕪蔓之習挺然一作者也乾隆四
十六年九月恭校上

總纂官臣紀昀臣陸錫熊臣孫士毅

總校官臣陸費墀

原序

三嵎介東西蜀之間雄秀而峻極士生其中大抵莊靖篤實而文亦如之自入國朝以勲勞名節著見者代有其人至於居言語風議之官而正色不回有殞無貳使人望其風稜如與三嵎並立者則余於陳員二公為有感也蓋司諫陳公純益以正論救時於封國之始而太史員公顯道以忠言輔上於乾道之際流風餘韻士皆宗之然陳公之文今不盡見獨封章之載書右錄者僅

存一二推此志也雖與日月爭光可也若員公之文則傳者衆矣高古簡嚴惟陳言之務去極其所就必欲至杜韓而後止李柳而降非所願也然余之所以重公者豈獨文而已哉當公在館學時國有大議凡掌諫諍司出納與夫執簡立柱者所不敢言而公獨言之歸附既留而垂遣摯御因逐而旋召均輸久廢而驟復此三者皆上意所深嚮朝廷所必行而公上不負明主下不阿所好矢筆盡言囊封亟上雖斥逐致死而不悔也余嘗

奉詔增輯中興以來放失舊聞因得公諫草而讀之為之三復流涕不能已也然則余之所有感於公者豈獨文乎哉公沒垂六十年而心傳猥以非才誤膺招聘竭來成府訪別父兄過公舊廬低回而不忍去公之孫榮祖出公遺稿示余求為之序余於公既所深慕而先大夫荷公之知又為有素因而不復辭特著其大節如此使後之生三峒者全其所鍾雄秀峻極之氣莊靖篤實必如前人而後於斯文為無負尚公之志也始公未仕

時屏居郡之九華山自號九華子後人因以名其文然
傳於世者視今書纔十七蓋猶有所避就既歷五紀而
後全書出焉公名興宗官著作郎兼國史編修官實錄
院檢討官當修阜陵書時史無專官類以百司所報為
准故公之言與事畧不少見今方舉而重修之會有知
史法者表出之云寶慶三年歲次丁亥夏四月哉生霸
越五日丙辰轅道李心傳序

先兄著作未第時著書州之九華山人莫見其面晚策

名奉詔入館慷慨立朝屢以論事辱上眷知視生平所
學不愧不幸已矣獨遺稿存耳敬出之與有志古文者
共觀焉弟左迪功郎成都府華陽縣尉典寅夢協書

欽定四庫全書

九華集卷一

宋 員興宗 撰

五言古詩

和王丞絕勝亭

時序一轉轂乾坤雙旅亭此日即昨日春過秋崢嶸如
何萬象間寓我七尺形忽憶縣以西遠覽目屢經前峰
一鰲伏遙瞰千螺青是窮天外勝誰託世上名翩翩佳公
子語秀含餘清來此集賓客溪山兩鍾情亭如栖烟樹

客乃委浪萍共此一時勝遐哉萬古城長歌白雲過落
日金盃傾我至將無時庶以娛瞻聽三嵎此其一松柏
爭敷榮地靈瑩骨秀不受紅塵櫻今朝動清興有人踏
皇肩勝絕定何如同起為蒼生

遊城西李氏園李仁甫謝伯堅同會席中得當
字

吾生會如寄俯仰歲月荒安得無盡境寓樂窮時觴竭
來古城隅露坐蔭石牀皎皎月在野山光映低昂諸公

飲文字歌黛何由將環客者誰歟青青在吾傍此君有
令質簡潔韻自長一掃塵土想化作冰雪腸歲寒知幾
何衆木誰能霜獨此抱身正有耻踰平當高度竟凜凜
不以外物攘此會定清真此懷為君忘

春遊分韻得雨字

疎疎來往舟續續後前雨湖光不自持春色遽如許日
車忍停輪塔鈴幸無語

是日
無風

冲懷宇宙寬空濛我當取

諸公飲海棠下因賦韋陶體二首

相與飲花下飲極人自歌有酒不共盡奈此春光何翻
愁白日短勿厭紅樹多樹多尚云可紅落無停柯萬象
懸悲端歸卧山之阿

雨露下澤澤衆卉含新滋彼美海外棠嫣然自繁枝枝
繁不忍折與春作容姿春容無定好紛落青門道故山
菖蒲花九節石上老

遺任子淵省元六首

山花亂紛葩崇蘭度輕馥謂言抱正身何以堪衆目離

披委叢萃萬物困幽獨美人尋當來紉之佩空谷

平生數任李異質苦同調飢作一飽營詞欲四裔照蟲
魚慎勿箋皇墳可數與我亦玩世者畸言期久要斯人
竟天遊出語仍奇妙

何勞話前三俱共入不二耕耕我村田自免荆棘累因
茲等用舍已作舟不繫枯風掩我情零露泣我淚

妙想語不周中夜興抱膝憶昨親蛟蜃風浪身惻惻天
意增吳濤滄江渺何極君舟且勿理南首快所歷何如

西樓觀蕉花紅正滴

我有二三子文字粲彪炳一說為波臣或傳近華省豈
徒異榮寂又墮生滅境懸知羣物攝大類任毛穎不如
洗故習長笑天地永

我興一枯枿空此歲月度公幹仍多難病亦沉綿屢象
犀竟誰攬漫衝江海霧誰說官異人我才止堪簿

送李省元周輔

舟亦不肯駐人亦不肯息君有浩蕩志我帶憔悴色欣

然別我去吾寧旅終極念昔始知子氣度流輩百元祐
明公孫對面想宿昔馮翁口吃吃遇子亦賓客悼往懷
今茲俯見江漢窄一官家萬里悵恍凍飢逼

管寧

幼安湖海士氣杳秋空雲遠目隘九州誰識中領軍真
命寒栢獨逸氣崇蘭熏超遙首陽山夫子猶二君

阮籍

我愛阮嗣宗天懷達而放理觴墮沉冥出語輒清曠駕

金天四庫全書 卷一
言窮所之途窮涕亦浪伊人已真契誰謂失之蕩夷庚
得神超世以多岐喪

李巽巖四望樓

巽巖秘監起小樓名以四望邀同賦詩有笑
樓卑之甚陋之甚當易之者僕因分韻具述
李小築之意嘲其解矣僕得登字韻

青青十二樓萬瓦浮雲稜居者誰氏子酒肉堆丘陵一
閒峨眉捨此不為登清夢幾時回何曾舍虛凝本欲

了萬境竟為景所繩我友子真子士以古誼徵載書來
上都結束車不勝揅架備小築且以觴賓朋或人指之
笑謂此不能宏有如短尾航又如束翅鷹團疑戀殼龜
局類遭寒蠅卑卑形覆缶短短射依墉行行頻辟礙倚
倚難軒憑風立苦打頭月坐傷橫肱寒足籠擁掩炎軀
甌炊蒸俯首忽見地閉目可數層何當攬星辰惟堪掛
用繒君子促改辦不爾陋可憎我興聽是說諸友無乃
稱交從二十年我能識其膺彼腹椰子大千卷貯亦曾

李渤問古德芥子如何納須彌古德云汝喚李萬卷是
否汝腹如椰子大萬卷着在何處渤有省士子腹有千
卷書八尺之樓獨不能體作黃冠樸言迺水雲僧豈其
貯其身乎覽者宜一笑

八尺高而能礙晨興瞻想西南北衆萬皆環絰奈此歸
思何猶然間騫騰世好巍粉飾是態惡可懲元規塵可
謝肝膽醒春冰但使居者樂勿使疑者升諸公斂戲語
俄然迭嗟矜攜酒共過之牕虛納清澄員子眼力到數
來數歸鵬擬乎天上人天門杳不磨為君出登賦歸來
伴龕燈三年京國夢一柱立不能我數無何鄉神尻以

為乘

平等寺

萬籟久已息幽鳴竟天和川靈如有知野鳥時驚柯明月照我衣我起聊自歌無酒今可觴如此良夜何

即事

我本不即世世網以維之維之意何傷俯仰百念衰清真寓天壤誠盡復誰欺情忘物自遣深虞未忘時平生寄筆墨幽解畧自茲

述古

道渾語不枯意盡文自止思成繭抽緒渙若風行水
惟古先民吾今亦如此誰歟章句繪碌碌寄餘子

自荆入沱至鄂凡十日沱中

長蘆衝短蘆挽船如挽車一縷江搖天縈帶千里餘時
馬忽斷岸依依見幽居試問居者誰此地家焉如居者
顧我笑官何問之愚一生宅莽蒼豈覺城市娛出戶舟
為步入戶羹為魚田牧我有時牛羊與之俱但願秔稻

豐俯仰無所須山河總白日城市仍丘墟我興愧其言
勞生嘆囚拘因笑永民鼠人大長狙狙

送校理梁同年子輔守彭門

衆萬欣有託我興渺無依軻雄去則久道論何其衰味
薄成抱惡時趨化心低豈謂杳莽中有子相嬉嬉君乃
柏下苓我乃松間絲河關兩值遇綢繆竟天姿直我我
即敬曉我我自思如何萬里舟忽去不可維頻變覺情
易人遠中自移持杯動孤影秋風又淒其去日懸幾許

金定四庫全書
卷一
重來傍衰遲渾渾皓首交願言固來茲

送闕國錄守簡州

生世事憂喜擾擾合與分合即海上鷗分迺風中雲分
合懸有定誰能預戚忻心空等行脚得酒且策勲念昔
求見子相看每相羣黃緣再值遇天南話鄉粉朝聲並
屋喧夜飲竟面醺我遇不易振但知祖皇墳君言時作
我神機謝耒耜如何日蹙呬蹙呬向我云自來越上吟
五別西山片緬然動中懷羈心為之焚辭殫起後慮往

勇稽前聞歸思溢浩浩江流泛沄沄君鞭先我着我其
敢後君蜀遠誰肯顧萬里乘華勛國恩自丘山彼此當
勤勤况復坐紅日椒桂來奇芬人生行樂爾妙寄窮天
垠却寫分外慮太空鼓蠅蚊君行不作癡我將理吾軍
漸營卓錫地遺書收放紛故家通社臘與子同朝曛斯
言不自領請移北山文

宜賓別楊同年

江行駭湍濤文字無暇尋滿聽舟人歌宵中垢穢侵宜

賓夷獠鄉繫纜日欲沉倉卒拜年契外堂聞韶音雞肥
為予烹酒美亦共斟語笑不知夕蟾蜍滿衣襟首陳兵
戰謀西北敵可擒次論月蝕詩獨採全愈心未憎輕簿
走竊譽希山林儒學規矩奇約繩固所欽誓將革愚魯
庶異柴與參會淺別又長情重愁愈深願終保壯節勿
作澗松吟天子思太平此非久滯淫

哭侍制許先生

平生一靈臺機智得深屏出使星移天歸朝月生嶺上

書肺肝露不事頰舌逞事狀嚴歷歷九原忽蘇醒

夢邵徵君

歲庚午四月余夢明而哲者謂曰子知我乎
我原也余與之言其人有林下風氣余辭蓋
塵矣覺而思之超遠之士無所謂原者意原
乃三國之秀邵徵君乎何自而夢我也昔斯
人不屈於曹公顧屈夢於我哉無迺亦有以
知我歟

我夢窮躋攀滑滑泥掩勝我自摩天嶺而轉風木榭有
客冠甚峩見之驚已乍邴姓原其名風流茂曹謝賓我
復坐我豐草殊可藉英言有深吐微論亦高駕與原濶
千禩待我仍管華華歆管寧及原為三龍相友善斯人竟天遊神尻不
暫却願言赴汗漫同予觀物化

題山月水月二亭

山月水月特庵喻子生平所釣而遊坐而息
者也喻死矣而亭日虛吾前過之煙草萋迷

即有追賢悼往之念今復來此因賦是詩以
留亭上庶以代相挽之章也

山月照我形水月澡我神對月淚已波尚想亭之人高
懷寓玄照清晤逃時紛老我竟誰憐歲月空崢嶸寒光
注夜夜瓊樹舒冥冥而子於是間逸抱回天真我時走
浩蕩乾坤渺虛營文字掛衆陋一縱不可循子起笑謂
言世念違紅塵忘言亦忘默第飲千盃醇藉我月下草
枕我亭邊雲遊將躡天去寸步逶迤親故人今何許白

日仍西傾悼往迹已邁趨交意彌屯尚爾一徑迷烟草
空亭亭何當三千秋歸鶴驚四鄰

挽二叔通直

知公經術富少小足奇尚堂堂蘭茁芽願言契新賞蕭
條度風霜汗西鞍馬上暫行幾羊腸世路蛛自網綠衣
一秋荷而能脫塵鞅聖言得微奧理明詞亦暢有文不
帶酸餘味甚熊掌其中殆天全識解自超曠事佛當晚
年精神著內朗禪談水月澄逸韻天風爽我昔尚童子

門戟過雙戟而公見之喜單辭幸相廣勵我多苦心寒
庖對珍享山花草然然胡為歲月往瑞蘭期遠插庶以
慰黃壤

州以隆名誠盛事也父老歡喜一詞僕亦感且
慰因賦詩以志其盛

青峰高隆隆赤縣垂世世俯仰或百年興衰寄一字有
人紀國勲今日起天意父老歡不徹衢歌傳盛事

詠鷄頭

金史四庫全書 卷一
桃李妍衆目取次紅綠揀練練湖中姿佳菓鬚作鐵名
字勝且高意亦傲鷄舌薰面君莫侮滿腹珠璣列昔者
靈沼會賦就蘇子轍只今風味遠是說非密說

詠蛤蜊

君起西南思為予疊前篇我興樂東南珍烹口同然佳
哉有蛤氏商略依舜泉

舜泉事見山谷詩

馬刀形則古瓦屋蟲

能天

蛤蜊大名馬刀小名瓦屋

入手意便韻況余謝輩羶何必逢麴

車為君口流涎

詠江鯀

鮮鮮眼中瑤玉柱出珍抱吾家天萬里識君恨不早攜
來定雪兒中膏非外槁不知何物尤醉臉茲一掃平生

珠為鄰冰盤仗幽討或言比丹荔同傳韓非老

東坡云
有如江

鯀斫玉柱所謂韓
非老子同傳也

欽定四庫全書

九華集卷二

宋 員興宗 撰

七言古詩

賀雨

并引

若歲大旱用汝作霖雨乃人君命相之辭提
刑顯謨自西蜀使華慨念斯民憂於久旱炷
香祝天不崇朝獲甘雨蜀路生齒樂意具足
與前賢若歸一揆目擊盛事因賦古體以紀

盛德

歲若大旱作霖雨禱而雨兮旱不苦誠之一字與天參
往古聖賢珍此語歲星在蜀二十年觸處豐登多黍稌
世不少惜蹂踐之枉使寶稼棄如土况復縱恣相憑凌
氣焰熏天遽如許三綱五常淪且斃以故傷和逢瘴怒
早魃為災熾裨暑撲庶陽烏乘九數火雲釜甑蒸肉山
不奈炎官云我所公方憂民心瘡瘡掃除熱瘴還清楚
却憶曾侍玉帝旁授以金科行按部辦獄更過顏魯公

一路傳呼御史雨不聞匹婦且銜冤西蜀向安誰敢侮
和以致祥應止止喜見太平舊官府肅時若是號休徵
甘澤霑霑來以叙石燕漫飛商羊舞穴處那能問狐鼠
巫覡罷散鼓笛間龍德欲歸江海去為言西成祀田祖
飽食不驕民樂聚昔何戚嗟今怡悅力回造化公為主
濯濯厥靈玉不焚伊格皇天歸宰輔皎皎無若雨反風
變理陰陽且封魯禦災捍患世亦希可但明時繼前古
願言霖雨思賢佐鑄入堅珉作詩譜

遊漢嘉明月湖次宇文子重韻

君不見天台賀季真鑑湖一曲光泠泠又不見錢塘林
處士西湖千載成高名千頃菰蒲抹岸白幾樹寒梅踈
影橫呼吸湖光映湖綠兩公便謂得此生吾僚胸次本
丘壑中有林賀之高情銀盤夜色清鏡動便欲邀汝成
三人旋喜巨羅金在眼肯議仙桂來無根前時六濁皆
運出招此不夜歸重城未蒙濡沫到惡客先苦詩句來
續紛思君對洗同一靜大勝狂歌歸四明

紫雲洞

府判李文於先大夫祠堂之側因紫雲盤其上迺作洞焉諸公賦詩皆瑞紫雲多以列仙之異言之愚謂跨黿先生忠誼不沒者也有以瑞其後紫雲蓋有託乎府判又能世其家且大之吾儒之喜頌者也即為賦此

君不見茂州長史文章翁生平姓字懸天東英言撼帝帝不從建隆以來無此忠今焉棲神寓玄躬道在翳嘶

峰外之高峰是間真趣排天胸指顧可了荆岱嵩邇年

秋練春光融離離渡漢舒溟濛狀殊宋車非越龍

兵志宋雲

如車越雲如龍

亦非石壁浮青紅望之雲遠討其蹤類風飄煙

欺霧濃

梁簡文賦紫雲詩云金風飄素煙

直排閭闔貫紫宮父老語我

昭我聾疑是先生不掩之精雄自爾支柱瓊崖中要把

英爽飛摩空有如韓王結襦騰騰化異氣

魏公試進士是日五色成

雲亦如衛生食昂疊疊欺長虹誠於斯民有願力此段

奇特將無同先生英名無有盡乃雲無心洞無窮或云

龍鑿發天秘不知的的勝事符阿戎勸君不必崑閬通

五雲之祥由李宗

尹喜望紫雲
下得李耳

君家種義昭玄穹可隸

黃字驅青童掃灑願勿俗子容斗酒為嗔王無功

僕自
擬續

瑞芝

知郡李文招賓友於洞之側飲未既有童來

前曰適得異草丹其蓋玉其枝童不名其何

物也余顧笑曰芝也分幹異本是應奇祥蓋

宗祀享答之嚴積猷德耀之及於是乎見之

誠不常有之物也豈其大門之慶乎會人有
酒乃綴數語以賀明日足是章以志山中盛

事云

君不見翳嘶路轉重行行玉几有洞含餘清跨黿棲魂正
爾所合沓萬古遺忠名洞口雲騰紫幕幕洞外草茁朱
英英從來精爽自難沒地不愛寶天敷榮嘉祥一書世
則瑞而況君家二者并請原昨日盃酒事公子沃客金
盃傾有童有童跪再拜云得異本由天成主人于于衆

客笑春入四座歡縱橫夜如何其不忍去翦燭細看枝
瓊瓊有同魏縣玉三幹大似漢宮金九莖巖間義氣埋
不得宛轉再露乾坤情公子世猷亦有相他山之石何
由生願言勿隱東郭几穩出卧護南陽城天邊瑞蓋兩
旌節我相公子非癯卿

歌兩淮

并引

事以詩敘者唐人累累有焉然有之而工工
之而傳惟少陵樂天二氏乃已也蓋少陵以

嚴樂天以詳兩公於事皆工於道達事然矣
語未嘗不然則人之從之亦信乎其然也嗚
呼風雅數變體厚語極至此可謂難哉吾蜀
虞公常援尺箠笞敵兩淮之上敵憤以死此
事曠古今一快者賓客欲表著鋪張而緒言
之其當取杜乎當用白也吾無適而偏廢矣
雖然吾非其人也勉賦悲兩淮一首

君不見北風吹淮風浪黑鐵馬千羣凝一色當時廟論

孰經濟將相無言潛動魄或云南紀當何憂今代諸葛
身姓劉陛下喚取守淮甸彼有勝算踰干矛登時詔語
從天墜記為先鋒鉗制置併遣健士付阿權等是兩淮
兵馬地豈期將潰兵川流翻手忽忽無十州前時冠劍
錯準擬此事吐口貽人羞幸哉天禍不終極至尊避殿
憂思集樞臣督戰侍臣謀上則倚公叅贊職征鞍此日
去皇皇所過騎士多羸傷不見何人出聲鼓意氣但見
十十五五坐路傍公趣下馬詢衆語衆共來前致辭苦

平時節使驅為奴逐逐無聊戰無主而今側身墮兩失
官騎已亡難再得誠令軍政日月懸我有微軀人不惜
公聞瑟縮涕潛然汝曹寄命真可憐朝今清明萬乘聖
權已殛死家南遷若等是行能奮死朝建勲名暮朱紫
官今付我誥如山節使察使皆在此軍家聞此逐蹄輪
喜氣酣酣如遇春當時戰死身昧昧今日分付當其人
兵官來見同聽命適有時張王戴盛分麾列伍擺布畢
髣髴平戎萬全陣斯須望敵來何多千里斷岸皆遮邏

天低野曠笳鼓咽衆寡不敵將奈何是時仲冬日建丑

初八

羣雄爭先莫肯後濯纓刑馬震天地皦皦兵威古無

有旋見飛臺天樣齊黃蓋團團傍赤旗指揮渡河在頃

刻我默戰義人安知公呼時俊騰口說汝每四方聞膽

決只今戰態作兒女便恐汝名從此歇長嘯激俊揮戈

迴萬斧並下聲如雷十舟先粉百舟敗連艦接艦成飛

埃嗟敵初來何草草一夕崩摧如電掃命踰破竹青離

離血潰江流紅杲杲明朝北陣更奔波坐料強敵成蹉

跽

十一月
初九日

隄防更藉盛新力為我往護楊林河運去一

朝同覆水敵再渡江終送死射人射將數不徹何況更
問舟中指移時曉天送哭喧棄舟而遁舟自焚公命火
攻列火傘船焦檣爛無逃門敵愁驚心疑鶴唳十步迴
頭九墮淚又疑官軍尾其衆清野數州無食地衆殘北
顧心悠悠金亮更欲抵死留放言京口少備者曷若舉
兵由潤州大將顯忠來是日執杖升階光照席公先勞
苦甚生平遂借百舟如過鷁迺遷仲冬日十二旅食無

烟寢無寐公來督府見相公便及瓜洲防拓事督視推
公膽有餘此事豈忍他人徂昨來兵試威萬萬別遣諸
將無乃迂公仍稟命侵星過或傳鐵騎金山破淮西萬
姓舍惟煙淮東居民淚潛墮公擺吳艫異水嬉勢壓海
浸傾天維一見使敵無可奈再見使敵心骨悲敵亡傲
兀猶不悟尚呼達官招萬戶歲云暮矣無北歸我所思
兮決南渡達官再拜乞徐徐波浪駕天千丈餘比前采
石三倍惡主其急我吾其魚金亮尚嫉忠言醜快劒垂

垂擬其首只今速渡汝得活不爾愛身身在否萬戶相
顧歸相言慄慄難容血面論北人項領不易保如此郎
主何足存此夜疎星江淚濕敵將一一彎弓入御寨三
重侍衛郎對面公然如不識帳中方嬖花不如帳外忽
飛金僕姑投哀賒死身困苦軟語不類平時麤骨肉披
離頭萬里魂飛却作他鄉鬼殺氣漫天烟草迷不歸州
絕風塵起北歸敵訛
為不歸州君不見昔日秦魏之兵扼上流阿
堅阿瞞皆老謀肥水血腥赤壁潰兩豪一屢泯默至死

休況我中都往顏促千古喪師無此酷沉寃萬衆銜已
久合省天心宜下燭三十年飛戰馬塵支吾多用豪傑
人但傳兇勢時未減不見度外加經綸須信更生無盡
福高價屬公勲譽遂不費兩淮千斛水一洗萬古乾坤
辱近來分陝從天闕懸解西民愁百結三軍鼎鼎禮意
濃七兵堂堂恩數絕行并咸秦脉絡通更遣諸將圖山
東為君再賦洗兵馬下客敢繼唐詩翁

永嘉水

并引

韓退之陸渾山火詩變體奇澁之尤者千古
之絕唱也併用其韻效之賦永嘉水一首以
呈同舍監丞鄭丈蓋丙戌水灾曲折得之於
鄭也

鄭侯興言水于溫厥灾茫昧數莫源于時頑秋後中元
淫虹曳曳妖暈噴夜星不呈墨微垣鬱律撼怒排天根
擺磨雜嶽濤飛軒豁驚瞥悚勢蕩渾凶颶埽寬震虛根
灤傾瀆裂軸轉坤腴腴萬馬來聲喧衆鼓駭駭闐闐塤塤

淚漫漶送無回
云陰旄威毒空飛
騫嬰鮐漂沛趨冥門
帶不屬隳巾裊啾啾直上聲
天冤元驅鬼紐俱奔奔
肉不擁掩張髀臂母識子死
翁號孫凌耶厲耶千山髡
而況下數鷄鼠豚淖淖飛濺疑翻盆
津水潯沸鵬猿目材耳井其能存
我知其端義可援無乃水伯真少恩
翹翹挾兌凌屯手摩三山巨靈翻大漚
幕島叢旗帑天吳不仁閃雙溪
主張龍孽龜魚鼃牙眼怖鰐翼厲鯢
哈呀擺掉齒腭反禹手不胼息兩跟
四載難乘駐厥輻

漢家循河昔墊昏側身以蔽太守尊淑東之東孰于藩
赤子魚頭浸莫言帝階修修闕重閣嬖嬖欺天樹幽怨
沉家十萬忍不論誰歟廣騷些其魂幸哉皇明煦朝暎
羅金走帛恩丘園我咨溫人為周爰河魁之應顛崑崙
嗟嗟奚自理不煩常盤喜鮮口吐吞剡元剔鬣命蜿蜿
毫髮不備唏空飡以是眩客詔後昆帝救海若澆愁痕
自今起仁略炮燼縱彼川泳鱗鱗掀物不暴殄帝所敦
永嘉于于福以蕃嗚呼愈也惟戒焚我則解摘哀窮樊

其亦滅愧心可捫

遊九頂清音亭次宇文子重韻

君不見昔賢聲名渺雲邊追慕茫茫千百載東山遺墨
不塵埃南海碑辭尚光彩是公胸懷冰鏡清當時玉署
厭殘更惟餘清夢到古寺因為亭宇加修名亭邊古洞
可治易何必竹溪師六逸清音不斷山不磨人間袞袞
成今昔往日中都朋黨興賢者皆思御李膺元祐諫紙
今最重此亭返不蒙知音我聞膠西黃樓賓主列賦就

價喧君弟輟彼樓雖已陷幽都名號猶為人記別

菜食

東坡謂竹為君魯直謂棕枬為君僕以菜為
君蓋不飲其味飲其德也食之者無後悔不
謂之君可乎

員子一寒世無有愛簇生盤如愛酒菠薐鐵甲幾戟唇
老覓緋裳公染口駢頭攢玉春試筍搯指探金暮翻韭
達官堂饌化溝坑我誦菜君人解否

酬新安仁孝主簿

汴水奔流天子都海涵百谷來羣儒黑笠白袍紛盈衢
清才落筆各有徒人人懷矛戈戟及文陣未戰磨以須
我方整旅備不虞坐驚繫微黨援孤聞君烈烈真丈夫
外視宮室呈廉隅於時委身願投壺亦既見止心則愉
聯翩折翅同嗟吁奈何西歸不得俱地遠天高成異區
尺書相問藥困痛繼之詩句非常模字妙義獻堪僕奴
幽懷感深長鬱紆魚目安可酬驪珠古今窮達猶擣菹

慎無致意榮且枯六經且務評精麤一朝良媒聘閭媿
和房山館魁衆妹

哭友人故校書王君夷仲

天台種天天一色先生乃在山之側擁書萬卷日逍遙
戶外絕無塵土客自跡詩書分戰場垂垂六甲皆科郎
治言說盡萬物理亦有苦語原天荒保寧之軍憤苛取
大夫回回軍吏苦公來約束仗忠信健兒三千膽如鼠
倦遊俯仰栖瀛洲吏非散仙矧肯留金門間作林下語

對之使我銷百憂人皆病心公病膝歸卧輕舟江月夕
君不見書劍只今誰訪君靈鷲蕭蕭墓三尺

贈呂德璋道人

并引

三嵎古異士棲息之地道陵叔皮爾朱之流
其故跡在吾鄉者幾見之矣東州呂德璋
道人其人質以粹其言敦以簡訪幽尋於三
嵎之頂儻可以見吾所不見者乎德璋頗能
詩有人倫之鑒且趙侯毅夫客也因賦一篇

以贈之

世網連天地窄君廼對人眼青白口占道論餘五千
身往仙山尋八百趙侯精靈足詩態員子慙愧今詞伯
不須對月人自三他年共作滄浪客

謂子及
呂趙

別眉山源上人

我生喜際招提客欲宜漚幻了塵色偶然揮斤仍六極
無相光中豈南北上人得我慰寂寞相與含笑了一默
生死奪機無瞬息禪談鶻落霜後翼中間鵲鵲露白黑

我欲角角急不得終朝為子寫胸臆回首江山忘鄉國
相看一夢非空質山風吹衣馬去樞君不見九華雖墮
名利場逢人也解吞荆棘

贈雲上人

并引

中巖印公元發空門友也詩言森秀羣衲未
見其比雖遭奇禍化為異物然殘章斷句當
與一世共秘不當與萬物共盡也每深念之
涕淚不已昨日玉津上人雲公攜詩見過頗

有中巖風氣審詢之即從印公遊者因作一篇酬雲以見老僕志今懷昔之念殷殷如此

君不見昔日中巖印元發聲名寓縣何煌煌層冰瑩骨語秀靜松風入齒詩清狂有時健筆賦巖石天地萬象隨低昂儒流稽首頌舌相往往謂帶花木香自從別我無消息江鰲無情江浪黑至今夾岸楓林青歲老迷魂招不得古來英才多薄命杳杳湘潭絲五色世間妙質便恐無使我哀吟纏八極豈料嘉川餘舊遊雲來雲來

開我愁時吐芳鮮恣吞嚼軟語髣髴從湯休勞生乾坤
我已倦飲半一嘯滄浪舟三峨聯子憩寂寞下視華屋
皆山丘

挽喻夫人

太丘落日東郊昏蘭風桂露啼幽痕年周九十笑語溫
衝頭雪矣花仍存仙裾拂拂始倚門扶挾何必煩諸孫
二鵲前起慰之魂喻宗老人五院尊衆口咽矣遍地恩
柔則之餘六四坤

--	--	--	--	--	--	--	--

欽定四庫全書

九華集卷三

宋 員興宗 撰

五言律詩

送崔子淵登第西歸

少日家鄰社生年說二崔
諸孫接高第吾子更長才
意逐歸鴻急身疑社燕回
再逢却持酒同上望鄉臺

春日過僧舍

青春了無事挈客上伽藍
遙指翠微樹來尋尊者庵
不

須談九九何必論三三且坐吃茶去留禪明日叅

海波

上妙空王殿靈神不敢窺乾坤捧堦率日月遶須彌八
柱真如宰三山自不奇海鯨吞巨浪只要十分詩

秋興

商君寧暫駐日轂不停翻白鳥歸何處黃花又一番異
鄉曾蝶夢今日伴鼇山幽事仍闕目巖雲相對還

挽喻朝奉

九十老生涯
緋衣落照斜
長安三度客
蜀縣半庭飯
素匙抄雪麻
頭鞭帶沙
秋風空色相
飛入梵王家

挽夔路帥韓薇猷

先聲一鶚天
萬點蜀山懸
天子留英閣
君王問進賢
玉書遺二冊
金馬獨三年
胄子文書活
花間愧管絃

敵舫浪花翻
瞿塘動暗關
君因漢戈甲
守固蜀江山
軫域澧渝接
樓船灩澦閒
如何寧邑事
不屬邇臣刪

若試遷都策
山東自不灰
政刑仍玉雪
議論亦風雷
瑞

竹雙光斷靈襟一夢摧而今夔子國廟貌日悠哉

挽待制許先生

尚憶西方守輸忠北斗邊疲氓千里裕破竈萬家煙桃李不言處虎狼今滿廛傳聞敵泉淚半在蜀南偏

宣室來何暮都門價已喧皂囊說二六白髮任三千國老躬為地羣飛哭刺天門扁許見否真氣悶元泉

衛幕昔年開西英續續來諸公叅牧政愧我忝書臺往事風流盡於今志念灰侯芭萬感集空抱報恩顛

哭劉夷叔

迢迢江湖興乾坤墮渺茫近傳行在信為報故人亡
蓮社今誰繼詩壇竟不昌無家成句法佇立泣斜陽
何人言曠遠吾子了希微幸有青雲志如何白骨歸空
江流蜀恨哀鴈帖雲飛若箇情親者滄洲有願違

哭黃省元貢

故國地靈處人文天意深公從捫膝子句亦掉頭吟
白雪雙歌斷歸雲無路尋祈招渾簡遠我念正惜悵

惜昔豺狼路喧卑燕雀羣誰歟非楚咻何者避秦人黃

卷中如律青雲斷後塵幼安湖海趣百世不荆榛

此一章言

公不媚媼可尚也方秦氏用事趨者如燕雀公未嘗以點墨遺之頗有幼安棄孟德之意此避秦者也

挽范通直

才叔之父

羈遊不記春書劒老風塵為問長頭事無踰四乳人青
衫經濟念白髮苦吟身尚想忠文舊天涯淚滿巾

七言律詩

壽虞丞相

今年輔相得真儒和氣融融慶歷初一柱擎天隆廟社
三邊無地着兵車功名入手歸談笑操畧隨時自卷舒
萬歲千秋臣主願未饒兩紀說中書

敬捧仙家九醞觴試將窺管述鉛黃功名采石乾坤大
議論襄城日月長收拾元勲歸鼎鼐扶持公道起膏粱
敵人正爾咨年貌莫放青青鬢染霜

海上三神絕地維巨鼇移着劒峰西山高自昔翔鸞鳳
人傑於今拔象犀夢說已知箕尾近生申還與嶽嵩齊

他年要作封留地便覺峨眉氣象低

命圭相印錫元勲天子龍飛第八春昨夜老人推甲子
明朝寶牒換庚寅壺中日月胚胎久掌上乾坤把握新
二十四年黃閣樣坐看霜雪到松筠

中使傳聲出禁闈曉庭烏鵲遶簷飛天香暗度金虬暖
詔墨遙迎彩鳳歸四海每年歌詠滿兩宮傳賀古今稀
殷勤更有南星極長伴文昌拱太微

三邊騎火照桃林髀骨渾驚歲月深衮繡東征非有意

衣冠南渡不甘心人皆穩步金懸印公為捐軀雪滿簪
將相勲名千古事試將全傳細推尋

吐握勤勞只自卑人希賔退欲歸時一編燈火重簾靜
萬里關河夢枕歌周召成名須保義蕭曹何事盡規隨
維新造化今將始魚躍鳶飛物物宜

千齡期運到如今古佛更生願力深鼎鑄萬方陶冶地
燈傳一點聖賢心全機徑度曹溪水大地同霑傳野霖
從此不須憂歲旱桑麻處處樹陰陰

黃道初開御幄新山呼動地聽絲綸人間喜見新丞相
江上猶呼舊舍人此事十年爭屈指於今四海在洪鈞
調元別有無邊手付與江山自在春

冠裳初集大明宮祇倚堂堂廟柱雄門外問年驚潞國
陣前克敵記萊公肯穿豹尾趨南極羣向螭頭拜下風
轉物工夫渾不動折衝端在笑談中

凌煙漫說古丹青玉立堂堂聳大庭仗內留班隆體貌
端門扈從看儀形槐陰匝地中書靜榆塞無憂外戶扃

乞與八荒安穩地河沙一是修齡

此生恩地更何之教育偏深未第時舉世盡知牛馬走
從公看到鳳凰池應憐弱質含春淺豈是陽和變杏遲
願上君臣千萬壽白頭東閣賦新詩

次韻送鄧祭酒

雪態垂垂鬢兩邊官身底事厭蓬旋秋風蓴鱸歸張子
春草池塘賦惠連詩卷清思出冰玉扁舟活計任湖天
南山得去初心遂冷笑襄陽孟浩然

欲去未去重湖邊贈公一言公即旋念無三徑作陶令
好繼七人追少連官路行持荷葉橐清罇且趁菊花天
懸知投老護四印到處南綦心嗒然

我家西土官南邊學省愁卧思言旋羨公散吏一龍小

去卜真隱三龜連

公得小龍為玉隆散吏將寓居衢之
城三龜者衢之城下三山相連如龜

者也公前此得部刺史上欲
優公而心倦行故以云也

賢哉復有大夫嘆倦矣羞

題刺史天作惱岷峨限斗夢魂相值意翛然

去去不憂豺虎邊陽關幾作絮飛旋揮金將對父老語

鋤豆勿遺根株連閉目時教風掃地沉心大似水涵天
西湖淡粧君念否十客何時十指然

時送公凡十客會湘上

知郡前日見過顧念雨霪不止蓋苗而未穠頻
雨者嘉生之祥也繼此真可以止矣因賦二篇
拜呈

東田水決西田流十日雨汁少日休勿厭唾金夜縷縷
準擬炊玉秋浮浮我欣清腸免牛吼坐快赤子非魚頭
社鬼豚蹄政浪得使君端是監河侯

欲墮之雨天垂垂三山容態無定姿隴邊風回香作餌
頭上雲黑疑催詩粘壁蝸牛心得計沸天蚊豹口何施
請占錦繡紋開後勿把琉璃鍾自持

用子文韻呈李參議彥澤

行殿青冥天盡頭草間祇解老伊周中吳誰命虎牙將
重趙幾成牛後羞君去忘家勿忘國我悲非劒亦非綬
動容乞予功名地不作西南斗樣州

驅車翻蓋電非追有客有客公門馳雙鴻西至一書墮

五馬南邊三峽遲
况值神傾意豁士
無愁歲暮日斜時
張眸指注話鄉國
為說兩川猶漏卮

賀陽帥

使節西來快舊遊
淳和一洗蜀鵬愁
文章星斗三千帙
號令風雷六十州
北地竚瞻司馬相
南夷祇畏卧龍侯
顧君翻出調元手
萬億春兮萬億秋

西掖北門明辯餘
道家豈與法家殊
父為鴻漸子鵬舉
兄是龍駒弟鳳雛
金版六弋回地軸
玉衡七政總天樞

誰知左相兵刑外草就歌詩頌有虞

雲安贈張殿直

旅愁不放上雙眉倚杖長吟李杜詩虎膽狼心須畏伏
鳳肌鶴骨恣詠奇章非索海無成日句想穿天有得時
珍重公孫才力健着鞭努力看追隨

送張郎中出守潼川

亭築休休未作難晚因觀物遂觀濶不賒日月霑新渥
肯對星辰戀舊官龜策幽幽餘處索牛頭衮衮靜中看

杜鵑口血老臣淚勿信東川甫也歎

與利州守

一襟和氣敵春陽教本寬仁鎮益昌未問禁中留名畢
且欣劔外得龔黃奔馳蜀道三千遠控制秦關百二強
況是太平今有象邊城處處樂耕桑

劔關雲棧蜀西頭公在平川最上流五百里中為甸服
一千年裏作賢侯城烏想爾齊師遁邊馬從他魏使愁
燕寢凝香無所事姓名料想覆金甌

夙稱無盡老先生况復鄉賢繼踵榮和氣四時調玉燭
德輝千里照金城羣歌太守來何暮細數長安去幾程
仰察帝心應有在時分台曜近周京

和何知郡子文跨鼇觀燈

山中勝踐蜀中稀炯炯鼇頭吐火齊

珠名也光照尋文
一音瀏亦本音

牛斗下流明夜徑蟾輪飛窟墮山西諸公泛泛千觴穩
我夢蘧蘧一蝶迷異日端門千仗散也能擁首聽朝鷄

送喻志夫登第西歸

羨翁詩禮飽丘園況有諸孫名義傳得雨蛟龍勢逐逐
接翰鳬鳳聲聯聯靈明入地含一笑癡客問天今九年
合沓高名吉人後會題影響疊前篇

遊西林寺

寺外青驄擁月題寺中笑語逐雲低不知春色老不老
來訪禪林西復西心地虛明簷外竹舌聲長廣眼前溪
幽尋寓我清涼境何必羈愁念故棲

遊湖

并引

三日前約湖上之遊休日微雨諸公倦出獨
禮部仁甫兄勇往諸公繼之是日晚晴樂甚
此雖陳迹亦一段奇特也分韻得濛字

湖光無礙雨溟濛且任蘭橈去路通珍重羣仙三日約
忍教春色二分空人言羈思鷗前破天遣清樽我輩同
笑指城闌倦歸思晚晴對起舞雩風

壽李巽岩

烏衣巷陌盡清閒鸞鶴飄然任往還九棘三槐前魯國

一椿五桂老燕山姓名玉笈琅函上班次珠宮貝闕間
數百年來傳洛學儘從尹喜望秦關

壽張母

楚玉騷頭雲錦裳天然智術自成章仙娥宮裏香風遠
慈姥巖前慧日長良夜北陰循軌革清秋西母薦壺觴
願言桐桂皆蕭呂葉數宏開八九行

欽定四庫全書

九華集卷四

宋 員興宗 撰

五言絕句

六月初雨中渡西湖因至道人庵燒佛香略憩
靈隱與鄉僧同啜茶乘晚以歸

獵獵風歌袖垂垂雨打船最憐荷似屋不障水如天
溪頭斷續雨松下送迎僧世境不到處心融意自澄
久困塵埃夢暫隨香火緣栖鴉急殘照我亦踏歸船

燕居

今我非故我行禪坐亦禪送風當八面一鉢老三川

新灘險惡不可前遂出乘灘下舟作詩送灘上

舟

水面數千里賴公託此身如何阻惡灘與我為參辰

代舟答

我實假衆力送君遊蠻荆灘危不可前徒有濟川名

再送舟

公非不通險任重載者淺此去荷責輕又得先歸便

舟再答

此去責雖輕恐為商賈資細瓷枉壓我使我成徇私

木樨花二首

承露珠微微弄態金淺淺秋風一披拂清意忽作遠
山空花更幽日透香自永只欠欹月梅同汝弄疎影
和何知郡子文冬日即事

甲觀吾何事丁年歲又周霜餘一尊在梅過百花羞

七言絕句

上許大卿

因嗟零落栖遲客，舊注聾牙詰屈書。
腳踏紅塵愧泉石，身無清夢到蓬壺。

晴霧青冥馬首來，道逢雙劍倚天開。
北軒賦就含經緯，斗覺靈光氣象推。

病中春盡言懷

萬象無涯春有涯，愁腸幾逐夢魂賒。
解吟整整堂堂句，

勝看紅紅白白花

往省隴阡遭雨有感

村煙漸稀村徑失山雨或過山花泣此身浩浩幾轉蓬
此口離離當掛壁

走筆送王省幹

秦樹青冥馬首來路逢雙劍倚天開江山細入騷人眼
好帶詩囊古錦迴

遣興十首

好在青山成獨往無端赤縣擁清曹會須披草對田叟
豈問無豪即易高

閉門不出我何為詞之洽矣昌其詩暗邊沈謝可摸索
高處曹劉任指揮

月鍛便驅詩入社年侵何賴酒為徒而今便作顧夫子
白絹搭頭間著書

大到黃初掃地無我輩乃欲窺唐虞崇崇筆塚遽如許
劫劫飢坑有是夫

草色當階綠漸侵我觀物化豈無心
風軒納絮春無賴
雨屋闌愁夜不禁

牆外遙峯列黛眉堂開尚友好棲遲
且栽筠篠成千箇
與管烟霞當一司

手弄茶月玉川子腸入詩星賈浪仙
寒吟苦飲息萬動
兩公等是區中賢

陝府東郊魏仲先曾言無事小神仙
而今懶殘渾到我
去子百年仍著鞭

一秋病暑暑纔退終日倦書書不翻生怕朝衫誇若若
且容居士號閑閑

舍南百尺樹駭綠籬外一梢梅破春不須訪我伶俚事
儘有幽花料理人

題峴山圖

樽俎當年緩帶公山月自高亭自遠榮榮枯枯幾晉餘
世外蓬萊忽清淺

題灞橋圖

百篇醉倒長安市古今只數騎鯨李何事騎驢踏玉沙
詩叟一寒乃如此

春事已深終日坐忘有感

靜中我不記吾誰戶外春搖百卉腓何處聖賢留箇箇
勿喧孔老競師師

江頭送別

別語離離風作惡羈情滾滾江何盡石頭路滑好一驅
入境遲公提正令

乙夜覽奏天震動甲科除郎君等閒玉堂再至不小却
語邊勿惜鬢毛斑

白雲洞

我有孤心寓白雲白雲起處自心親白衣蒼狗今休問
且伴研朱點易人

歸巖無定出無心過客從何議淺深只欠太湖三萬頃
吞空不許世塵侵

石照

吳中市井漢淮陰落拓錢郎用意深希世異人人不識
却因頑石遂知音

題普慈官舍竹軒

一生憫憫寄儒冠客路羈愁特地寒擬倩幽梅當供給
旋添疎竹報平安

虎丘生公說法堂

折天一徑入林幽亂石牙牙蹲虎丘不為生公夜點首
世間般若自頭頭

贈金山老

一鈴自語風薄林千濤夜湧月翻金寺內何人口生醅
阿師政爾息深深

距西湖五里至白塔院名藍連五六最幽絕云
清流汨汨樹斜斜勝地金山底處家總是光明拳下路
任人擊竹笑桃花

偶經西湖林逋故宅四聖觀見旁畜野鶴立草
徑對之蕭然有懷

未分幽容相料理只緣老子合婆婆此中琢句出冰玉
曾吸湖光奈爾何

霜草深披野徑開幽情端有鶴相媒筆椽擬欲題三尺
悔欠一龜行李來

再往上竺遊渡西湖忽晴忽雨淒然有感

湖頭接城城滿煙湖尾亂樹昏連連從前觸境關心事
萬里橋邊家可憐

乍濃乍散後前雨相笑相迎來往舟四山眩轉我作惡

不慣長湖生許愁

遊凌雲寺

半日緣雲看九峯
江狂樹怪滿雙瞳
可憐玉磬僧廊下
未奏一聲郊廟中

射潮

望中劈箭度輕篙
誰省儂家意氣豪
潮落潮生不關汝
三吳是處有風濤

秋中再至西湖荷花半殘
淒然有後時之嘆縱

步投夜歸城中

未暇鷗前弄清泚都緣帽底踏黃埃荷花淨盡有底急
不待商量細細開

禁當芳意忽蟬噪張主客愁惟鴈聲賴有清沂舞雩態
湖窮却與月同行

送王檢討年丈以足疾辭歸天台

孤心琳宇事無事再拜玉門山上山重至玉堂合小却
好抽金匱為重刪

天台真人分天章曾為詩翁掃粃糠公過故山忽呼出
物從衆昧視荒荒

幽情不作宦情薄衆足羣知尊足存收拾青鞋聊示病
踏鯤却遍水雲村

李太白古風高奇或曰能促為竹枝歌體何如
戲促李歌為數章

黃河溟溟日落海逝川流光不相待春容去我秋髮衰
擬欲餐霞駐光彩

天津三月桃與李朝能斷腸暮流水綠珠黃犬悲相續
何如湖海鷗夷子

郢客遺音飛上天誰歌此曲誰為傳但聞色聲紛唱和
使我默歎心悽然

鄭客入關行未已逢人見謂祖龍死秦人竟去無來蹤
千載桃源隔流水

隆州

有客張陵曾寓此仙乎仙乎生實死鴻名制作往事空

威蹟今應頌天子

笑殺丹淵吐語輕山城都不似川城不知禁路春風透
幾放溪山照眼明

衆山環環萬山過駢首三峯當道卧鬬分蛇鼠舊何人
繪入麒麟今幾箇

語我馮公有味哉巨靈恰續斷鼇回從今東道君公貴
免喚西州市令來

贈休上人


碧眼不輸巖下電清詩迸出隴頭瀧何須更下牢關鐵

出沒無心月在江

休善行草故
云牢關鐵

挽歸潁川喻夫人

夫人不訝容髮暮八十解將盃酒度不見歲寒今浩亭
花開花落悲行路



欽定四庫全書

集部

九華集卷五至八

詳校官庶吉士

臣

初喬齡

主事

臣

呂雲棟覆勘

謄錄監生

臣任

溥

謄錄監生

臣黃

鍾

欽定四庫全書

九華集卷五

宋 員興宗 撰

奏議

上皇帝書

乾道五年四月十八日左宣議郎秘書省校書郎兼國
史院編修官臣員某謹齋戒書昧萬死百拜獻於皇
帝陛下臣聞聖人感人心而天下和平蓋人心不感則
離離則天下之和不平者將應之矣人心之感不感

聖人初不間乎內外也以信示人無人不信以惠懷人
無人不懷使天下畢信畢懷是之謂德感也恭惟祖宗
建置社稷餘二百年永永傳不替之象獨非有以德感
人者乎此不可不稽也臣愚不佞待罪三館嚮者丙戌
之秋嘗入建請北方歸正之士捨瓊裘襲冠帶本非前
日一都督府力能誘而來之者誠以吾宋有大義中國
有至仁北方將士樂歸陛下之德故也陛下感之亦極
矣願幸加意以禮始終之是時國家未萌還俘擄之議

而臣之預言如此陛下過聽不以下臣迂愚其後繼用王友直於江上將王宏於步軍其餘才武以次錄用此聖主至斷至明者也中外率以為是今者敵因盜賊之萌乃起俘擄之請茲事體大應酬若失便闕安危臣日夜念此至熟也陛下若曲徇外庭之言不計利鈍不愛歸附姑曰還其十百以緩目前之患臣恐患自此滋矣且王言如日外庭乃欲蝕之使朝廷前日為義今日為不義前日示仁今日為不仁虛敗德意莫甚於此又况

俘擄一搖懼者必衆十可以聚百百可以合千風塵飛揚肘腋為變甚可畏也其性純良者自此生心其慕教化者自此絕望懷反側者自此有詞心剽賊者自此鄉道陛下異時有事北方沿淮以北陛下縱欲募用其人不知誰肯為陛下用乎此臣所以痛心疾首也今欲外圖帖息之計內寬流附之心陛下曷不試臣今畫三策於前顧臣之策必不為此敵餌為中國羞也用其一則可破不直之請用其二則可以塞無已之求用其三則

可以成久禦之利惟上所命也謂宜今日因往來之使
或對境之便遺之以書曰近聞侍旺懷異而楚州不知
州之罪也本朝居數千里外其及知之乎此因大國有
言然後覺之其楚州官吏並已竄謫沿邊軍民並已戒
約則本朝申嚴大國之意可謂曲折矣且侍旺自分必
死故支離其詞奈何大國聽之萬一本朝獲一姦盜妄
分析黨與入北界者本朝亦聽之乎如是則不直之請
可破矣此臣策之一也又遺之言曰甲申之歲大國議

和唐鄧海泗荆淮重地也輒舉以遺大國口血未乾繼有兩淮之役俘取吾民凡數十萬本朝兼愛南北之赤子惠顧前盟不敢求也今俘擄百十奔迸四出生莫知大國累歲求之獨何意歟觀此似欲搖動和議曲不在本朝天地鬼神其實臨之如是則無已之求可漸塞矣此臣策之二也傳曰善用兵者無赫赫之功豈獨用兵處事亦然也臣竊笑前者王琪等經理淮上引見而對朝辭而出道路莫不指目布置張皇竟以泄露諸將

所以備敵者近乎虛聲而敵所以疑我者積乎實禍臣
未聞事機不密而可用驚鳥不伏而能擊者也是乃敵
所以數啟紛紜之談歟今皆見之矣臣謂今日之事當
卑其禮而長其怠賒其日以寬其詞悠悠以靜處之縱
不見信必無大侵然後潛正師律默課農桑陰蓄器械
使事興而衆不知敵如何我則久禦之利漸成矣此臣
策之三也彼敵自辛巳及今迭戰迭敗豈真健者哉謂
秦無人故直欲以威劫之耳如不出臣三策則正墮敵

計悔無及也或謂臣之三策當矣陛下必審處之矣陛下智勇能遠圖天威能亟決然尚有可慮者太上之意主於和柔故陛下一切委順今者欲出詞拒敵恐不遑也萬一生事如太上何如大孝何臣愚以為此正陛下所以事太上而稱大孝者也大孝以安社稷為悅一旦歸附動搖流人怨憤憂獨不在社稷之間乎昔唐肅宗起師靈武猶不欲以憂遺君父當時以孝與之況陛下至孝萬萬肅宗者乎雖然敵勢實不可保陛下奈何不

早為之策哉漢七國削亦反不削亦反晉蘇峻召亦反
不召亦反今臣度敵之勢和亦變不和亦變特其變有
早晚耳而說者為徑與俘擄則繼今可以免禍是猶抱
虎而寢指虎之終不噬已也嗚呼亦愚矣曷若整械飾
戎求所以禦虎者今迺欲專用抱虎之術哉內外歸附
亦必用此潛窺陛下以為榮辱死生之決也措置一失
禍猶發機從此殆矣而可無思乎陛下若未賜清閒之
燕得熟數於玉陛願首試臣三策以次畢用之若衆不

附敵不怯榮名不成則是臣飾說欺君者也臣請死

嚴爵賞劄子

臣聞爵賞者國家之大紀也自昭其紀則無人不
服自紊其紀則無人不輕苟一目稍睽則萬目漸弛或致胥
商末流委巷餘子脅肩而冒祿攘臂而市爵雜糅士類
士蒙其醜此何義也且軍之有武功之有賞乃國家所
恃以責實也三軍所恃以勸後也有司踈怠實已乖戾
求以勸後將如之何傳曰非功獲爵則爵輕非罪肆刑

則刑褻謂此類也臣竊見比來軍功死事之家以功許補授子孫外並許其親異姓甥婿之數申明承受是乃國家欲感士心答天意收三軍後日之效可謂恩矣然朝廷雖有元創冒授指揮一一明具令所在軍將保明於大將大將保明於本州本州類申於省部如是則隄防檢押者甚至且密也然而戶為胥篋本以防盜也大盜至則并胥篋而取之人為法制本以防姦也大姦至則并法制以亂之今恩澤一下有力有貨賂取交關同

姓者遷作同房非親者指為近親委巷塗販一日華軒
士卒驚顧此豈三尺賞功本旨哉臣謂自今兵將死事
之家既無嫡親子孫及其近屬但當設法與給度牒及
不理選限名目之數使其曲折貨售惠滋一家終世飽
煖亦無負矣何至紛紛欺隱損國家之名器輕授之人
乎又近來死事之家多以無力陳乞而有力陳乞者決
非死事之家彼有力則百方計會事雖虛誕必不沮難
無力則事據雖實例蒙退却致使軍中勲力之後雖有

正嫡子孫不免低直輕售蓋壞陛下德意者有司也昔
康定詔書諸軍將校尉歿戰陣者並仰逐處子細一一
勘會如不實者亦有明科伏望申嚴是禁諸將諸州今
後保明被受恩澤之人或不能子細推考或勘會失實
朝廷覺察並乞重賜行遣庶幾爵賞之重有益國體

廣招募劄子

臣聞王公設險以守其國險之所設人之所畏也故蜀
有重關之險扞蜀者莫若守關吳有長淮之險扞吳者

莫若固淮若夫荆襄之地千里坦坦此四戰之地也外
無長淮以闌之近無重關以固之無關無河是無以為
險者矣彼有險者聖人常以為慮無險者信不可以一
日無備哉昔者宋齊六代之間夷盜南顧屢作屢止不
能窺尺寸土壤蓋是時此地為重鎮此鎮屯重兵故也
然則荆襄枵然無以為險者是不當以兵為險耶況又
春夏之間漢水可涉道路之多錯出可數自光化出次
湖可以窺夷陵自臨汝出新野可以窺襄陽自唐州出

秦陽可以窺西郢自陳州出宛丘可以窺光化苟無堅
甲利兵厚集於此則深恐漢蜀之勢脈絡未通首尾難
應異乎常山之勢矣是則可憂者也臣愚伏望陛下曲
軫宸慮起福未形擇諸將中文能附衆武能威敵者經
制此方且使以屯田為名徙內郡之兵增而戍之徙之
不足又增募之蓋今荆襄之兵甚少而守蜀之兵一有
外慮千里抽發未易致也或謂臣言朝廷於荆襄未嘗
不擇將諸將未嘗不募兵臣謂諸將招募無術以負陛

下委使者也臣自湖北所聞悉矣凡捕人補軍如捕逃
亡給予虧約諸將之令既不自信矣人誰信之前日劉
錡在荆招募茶商凡數千人以充正額苟得其術曲折
如錡則盜賊亦可招亦可用也況吾民哉韓琦曰招軍
次第在人員不得侵取例物無他阻滯人自不隔如此
則捐數十萬緡得萬兵矣琦之言舍小成大之術也惟
陛下諸將增戍之外又益私例使廣招壯實庶幾一方
即金城之固矣

恤義士劄子

臣聞威惠偏廢不可以御軍軍法一偏不可以用衆使
惠而無威則人不畏威而不惠則人不懷然後知撫士
育人者凡以張吾氣而保吾威也使列將大校平時察
察奴役其士獸驅其人則衆人披離居常已無足恃一
有風塵之警則又有足恃乎臣謹據興洋一帶義士西
蜀東道之扞蔽也其地險以厚其民力以武幼脫諸父
母之懷其心皆可以義動可以勢役者是以紹興之初

王庶在西邊極力措置凡城郭鄉社民各有戶戶各有
等庶使分等以出丁分丁以代卒無事則更閒有事則
出戍或與捐本戶之徭又與免本身之役恩意甚接科
條甚具庶區區行此者非獨為保蜀計乃為保國計也
是以南山控要害之衝義士熟識利害自生其地自戰
其地人懷保妻子守墳墓之念宜其專也臣觀饒峯之
役梁洋之役近時散關之役義士與有勞焉朝廷悠悠
而竟不知者諸將掩之也有能以王庶之心為心則人

有告矣然而邇者是曹寬抑類有四焉此邊將罪也蓋
義士比諸縣弓手手力實無顧緡然官能驅之而使無
辭者以元降措畫等第與免官業錢故也今則竄易文
書實者未必得免免者未必皆實一寬也凡有戰事正
軍堅甲顧避弗前義士楮衣驅以先進近時諸司有議
增置甲楯量欲給之議一出口而劍南士民飛詞詢詢
夫仰父俯子者劍南之士所知也一家接踵肝腦塗地
如義士者劍南不知矣二寬也王庶之役義士也大閱

則有食錢出軍則有贈給衣糧錢其有異功籍定名姓
以次官使今義士捨農而出枵腹而反勞則有矣飽則
無之功則有矣賞則無之三寬也紹興之初義士戰已
輒罷則各有一家之樂邇來官司無故占破俾之芻牧
俾之負擔俾借官吏往來之役且義士者謂之民乎謂
之兵乎謂之民則不當私擾謂之兵則不當私役今一
切反此四寬也夫以邊民有是四寬為將帥者忍不加
慮臣愚望陛下下四川宣撫司體量優恤如興洋等處

曾實充義士之人被官司抑勒不與依數捐免家業錢者並許本名申訴即與捐免諸陣亡之家亦乞照應此例施行其本戶尚有餘丁乞更不差義士名目後有關數於多丁處別乞抽補或當戍守雖令自備衣糧外亦乞今後更與減量本戶雜科名色務從寬厚其諸將州縣平日無故占破私役並乞依私役禁軍法務在必行仍乞取王庶初行約束一一相度檢舉庶於邊民不敢怨望其義士元有兵官統領一員將領數員亦乞下宣

撫司選差為衆樂推如近時閭閻之徒自足為用又照得階成岷鳳熙秦界上自紹興辛巳曾被宣司給散旗榜之人累有勞效被諸將掩遏未能申列者今後有願充義士名目亦乞比附興洋義士依次與免科徭庶幾西邊後有緩急增助官軍之勢不致危急得承平義勇之遺風伏望特出睿慮詳酌臣言使邊人生路一開挾續之思肆徧非獨結西陲之心亦聖主仁不異遠之意也

恤歸附劄子

臣聞天下歸往謂之王四夷觀赴謂之中國樂於觀赴而極其歸往聖人之能事於此在矣臣竊觀鄉者江淮歸正士卒捨壇裘襲禮義此豈一都督府有以諭而來之耶誠以吾宋有大義中國有至仁北方將士樂歸陛下之德化也臣前自上流過松江諸郡歸正之士往往而見其間游談坐作意態慘戚多不自聊者臣退窮所聞則所在統軍宿將不能推原陛下德意接之不以恩

惠是以囂囂相從於此臣竊思之華夷萬里異生不異
情人之生去親戚而舍墳墓甘酸苦而受困折者皆非
情之所安者也設若諸將能為朝廷相親相比布露恩
私如待寵子如支漏甕則歸附之士未暖席而得更生
矣近聞諸將輒有奴隸服役之者臣恐歸附生心役不
以義則其徇義之意輕撫不以情則其效上之心薄待
不以恩則其投命之意衰風塵忽警是縱虎狼於檻而
保其不噬嚙者也如是其可乎臣以為諸將無見於此

矣昔唐初有事於突厥中葉有事於中原回鶻特勒之徒何力國昌之將其人皆蕃種也其兵皆蕃兵也唐有恩以寵之魏官劇職共濟其用而共復京師唐於歸附一日不輕如此未聞諸將服役之且陵籍之也臣愚伏望陛下垂厚恩布明旨凡歸正士卒分戍所在深詔沿江督將與逐路帥臣務加存恤賜給之間務加優厚使其客主之勢一委曲相濟則情自相通然後旌其首戰功狀最白忠効最篤者陛下時賜勞問亦寵矣後有緩

急出入死地彼又何辭安知無國昌何力之徒為我用
為我守哉揚雄曰御得其道則天下狙詐咸足使此事
是也惟陛下幸察

察敵情輪對劄子

臣聞聖人有外懼故有微權有密機權以忍而後濟機
以忍而後發忍不忍之間安危繫焉使其屈伸在我平
日屈之一日伸之大事不足定矣外懼何為也哉昔勾
踐為國最爾國也奉夫差以玉帛又奉以子女常人所

不忍者勾踐一切忍之此豈其真情也哉彼其奔走事
人之日皆陰謀生聚教訓之日也故吳不有越而越卒
有吳者勾踐得此微權也曹公之於袁紹也地不如紹
兵不如紹紹未除大將軍操不拜也則避紹而與之曹
公豈避人者哉彼其曲意奉紹者所以急紹之心而緩
河北之兵也故袁不并曹而曹卒并之者曹公有此密
機也彼兩人興而機權用機權用而曹之王易王越之
霸易霸臣固知其忍而後動也恭惟陛下稟希世之明

天錫之勇常有掃清中都囊橐宇宙之意矣然而即位四年遵養時晦敵有小大勢有堅脆陛下權敵以御時俯已為和柔之盟陛下意豈在是哉機權之在是也陛下忍之亦至矣越王曹公之事規摹雖小充而用之必在陛下度內也然臣近者聞諸道路敵有無故之形和有不堅之意衆說紛紛不可執取議者猶以祖宗待契丹之禮以待之是不知役已者也自紹興至今敵凡幾和和亦幾變信書在道暴骨在野前日已不可保後日

庸可保乎豈可見其形不察其實信其偽不昭其姦百事揚揚猶類平日上下復欲長此安窮也為今日之計志慮當堅籌謀當預措置江淮諸處屯兵幾所孰要孰害兵甲增減為數幾何孰訓孰惰諸將可倚者凡幾何人軍食可理者凡幾何事誰善應敵誰長守扞至纖至悉不暫懈弛臣猶恐其未也若將相循循尚猶偷玩今日得報則四面倉皇明日無報則整容閒暇謀國如此譬猶抱虎而寢虎未及起因謂之安未有不為傷矣夫

四夷軌道兵甲不興誰不願之不幸或有外禦雖宣王不免也臣竊恐近臣大吏專以簿書期會為事舍此弗圖一旦有警因循將何及也詩云維彼雨雪先集維霰而知雨雪者見其兆也陛下察敵之兆而預計之機權在中應變在外陛下舉能辦此願戒小大之臣勿為媮怠而已杜牧曰國家大事小臣不當言臣與牧同一罪也惟陛下幸赦